

Tschechische Sproch

Der Artikl is im Dialekt Ostestareichisch gschrim worn.

Tschechisch (*Čeština*) is a westslawische Sproch, de wos vo zwöölf Mülleonan Leid auf da Wööd ois eanare Muadasproch (Staund 1999) gredt wiad. Zehn Mülleonan vo dena lebm in da Tschechischn Republik, wo s aa de Aumbtssproch is. Seidn 1. Mai 2004 is aa Aumbtssproch in da EU.

De Sproch, de wos im Tschechischn am nächstn is, warat is Slowakische. A jeda, dea wos aane vo de zwaa Sprochn vo klaa auf redt, kaun aa de aundare wenigst a bisl vasteh. Vo da Schrift hea lossn se de zwaa Sprochn mit a poa Buchstobm ausanaund hoidn. Nuar im Tschechischn gibts ř, ě und ů; nuar im Slowakischn findt ma ä, o, ľ und í.

Inhoitsvazeichnis

Oigemeines

Umgaungssproch und Mundoatn

Tschechisch oda Behmisch?

Schrift und Aussproch

Bugstobm

Vokale

Konsonanten

Aussproch

Grammatik

Oigemeines und Bsundaheitn

Deklination

Konjugation

Historische Entwicklung

Wos mitn Boarischn und in Hochdeitschn ztuan hod

Tschechisch (čeština)		
Gredd in	Tschechische Republik; Nochboalända (v. a. <u>Slowakei</u>), owar aa <u>Estarreich</u> ; Auswaundaragrubb'n auf da gaunzn Wööd	
Sprecha	12 Millionen	
Linguistische Klassifikation	<div><div>▪ <u>Indogermanische Sprachen</u></div><div>▪ <u>Slawische Sprochn</u></div><div>▪ <u>Westslawische Sprochn</u></div></div> <div>Tschechisch</div>	
Amtliche Status		
Amtssproch vo	<u>Tschechische Republik</u> , <u>Europäische Union</u>	
Sprochcodes		
<u>ISO 639-1</u> :	cs	
<u>ISO 639-2</u> :	(B) cze/ces	(T) –

Bohemizismen im Boarischn
"Bajuvarizismen" im
Tschechischn
Germanizismen im
Tschechischn

Beleg

Literatua

Im Netz


Oigemeines

Umgaungssproch und Mundoatn

Nebm da Schriftsproch, de wos in easchta Linie bei offiziölle Auläss gredt wiad, gibt s a oigemeine Umgaungssproch, is **gwenliche Tschechisch** (*Čeština obecná*). In Behman haum de meistn duatigen Mundoatn kaan großn Eifluß meah. In Mährn san de oidn Mundoatn no bessa banaund, duat findt ma no an stoakn sprachlichn Untaschied zwischn de aanzlnan Regionan.

De oidn **Tschechischn Mundoatn** lossn si in via Grubbm deun (Zweng de Numman schau noch auf da Koatn rechts):

- *Behmische Mundoatn* (1)
 - Do gibts via Untagrubbm: de noadöstliche (1a), de mittlbehmische (1b), de sidbehmische (1c) und de behmisch-mährische (1d)
- *Midtmährische Mundoatn* (2) - aa „Hanakisch“ gnennd
- *Ostmährische Mundoatn* (3) - de wos in „mährisch-slowakische“ und „mährisch-wolochische“ Mundoatn aufteut san
- *Schlesische Mundoatn* (4)
 - Do gibts zwaa Untagrubbm: de schlesisch-mährische (4a) -aa „Lachisch“ gnennd- und de schlesisch-poinische (4b)



Tschechische Mundoatn - Beschreibung im Text links^[1]

De letzn zwaa Grubbm haum a Dialektkontinuum mid aundare slawische Sprochn: de Ostmährischn Mundoatn midn Slowakischn, und de Schlesischn Mundoatn midn Poinischn.

Duat, wo bis 1945 Deitsch gredt wuan is, findt ma heid a Mischzone vo olle tschechischn Mundoatn (5).

Tschechisch oda Behmisch?

De Begriffe "**Čech**" und "**český**" stengan fia meahrare Sochn:

- Leid, wos de **Tschechische Sproch** redn
- Leid, de wos aus da **Tschechischn Rebublik** san

- Leid, de wos aus da historischn Laundschoft Behman (Čechy) san

Im Standartdeitschn hod ma friara fia olle de Sochn "**Behm**" oda "**behmisch**" gsogt. Im 20. Jhdt. haum si daun in da Hochsproch de Begriffe "**Tscheche**" und "**tschechisch**" fia de Sproch und de Leid, de wos a so redn, duachgesetzt. "Behm" und "behmisch" stengan nua meah fia s historische Laund "Behman".

Aundascht is in de boarischn Mundoatn: do sogt ma heid no "**Behm**" oda "**behmisch**" fia **olle** Tschechn und eahnare Sproch.

Schrift und Aussproch

Tschechisch güüt ois aane vo de schwaastn Sprochn in Eiropa. A wesentlicha Grund fia des is - nebm da Grammatik - da Schwund vo de Vokale. Es gibt vüü tschechische Weata, de wos kaane Sööstlaute haum. Auf de Tua kumman soichane Gsatzln zaumman ois wia „*Strč prst skrz krk*“ (Streck in Finga duachn Hois) odor aa „*Vlk zmrzl, zhltl hrst zrn*“ (Da Wuif is dafruan, er hod a haundvoi Keandln owagwiagt). Auf da aundan Seitn gibts recht vüü Zischlaute; am meistn bekaunt is des **ř** (r und ž auf amoi gredt).

Bugstobm

Tschechisch schreibt ma mit lateinische Bugstobm. Auf das ma bei de Konsonanten a greßas Lautspektrum, und bei de Vokale de Längan doastöön kau, kumman ois Sundazeichn Hakal (háček), Beistrich (čárka) und Ringal (kroužek) dazua.

So schaug de tschechischn Großbugstobm da Reih noch aus:

A, Á, B, C, Č, D, Ď, E, É, Ě, F, G, H, Ch, I, Í, J, K, L, M, N, Ň, O, o, P, Q, R, Ř, S, Š, T, Ť, U, Ú, Ů, V, W, X, Y, Ý, Z, Ž.

De klaanan schreibt ma aafost olle a so. Es gibt nua zwaa Ausnauman: aufn Computer odor auf da Maschin schreibt ma *d'* und aa *t'*; mit da Haund kaun aa *ḍ* und *ṭ* gschriem wean.

So, ois wias do stengan, sans aa in an Telefon- oda Weatabiachl suatiat. Č, Ch, Ř, Š, Ž san eigane Bugstobm. Des haast sovüü, ois das im Tschechischn 31 Buchstobm hod. Ě, Ů und Ý findt ma gaunz söötn am Aufaug vo an Wuat. Grod, waun amoi wos groß gschriem wiad, nochat siecht mas efta (zan Beispüü MĚSTO).

Hauptweata wean in da Regl klaa gschriem; Ausnauman san da Sotzaufaug und Peasonannauman.


Fremdweata wean oft bohemisiad (auf tschechische Buchstobm umgeschriem). Beispüle san *víkend*, *džus* und *džem*, de wos vo de englischn Weata *weekend*, *juice* und *jam* kumman und aa des sööwe haaßn.

Vokale

Des Tschechische hod kuaze und launge Sööstlaute. Auf de Laungan is a *čárka* obmad.

Es gibt owar aa de zwaafochn Sööstlaute **ou**, **au** und **eu**, vo de owa nua des ou echt tschechisch is. Des au kummt nua bei Fremdweata odor ois Interjektion bei Schmeaz. Eu findt ma in fremde Weata, oda waun grod zuafölllich a **e** und a **u** zaumkumman.

- *Ou* huacht si a wengl au ois wiar im Oststeirischn, Noadboarischn odor aa im Heanzischn. Des *u* is owar im Tschechischn stárka ois wiar in de drei Mundoatn.
- *Au* is des sööwe ois wiar im Hochdeitschn.



IPA - Toofe fia de aafochn tschechischn Vokale

- *Eu* redt ma net zaumman, sundan ausanaund. Des haast, ma sogt *ne-uralgický* (Fremdwuat) odor aa *ne-učím* (tschechisches Wuat, wo des e mitn u zaumankummt).

Aa waun zwaamoi da sööwe Vokal zaummankummt, redt mas extrig. Des haast, ma redt „samoobsluha“ (=Sööbstbedienung) ois 'samo-obsluha *und net* 'samobsluha.

Konsonanten

De Konsonanten wean aufdeut in hoate, waache und mittlare. Des is fia de Deklination vo de Hauptweata wichtig, weu a jede vo de drei Grubbm eigane

Deklinationsmusta hod.

De 8 hoatn san: h, ch, k, g, r, d, t, n

De 9 waachn san: ž, š, č, ř, c, j, d', t', ň

De 8 mittlaren san: b, f, l, m, p, s, v, z

Aussproch

De wichtigstn Regln san:

- Im Tschechischen is de Betonung ollaweu auf da easchtn Süübn vo an Wuat.
- A jeda Bugstob, bei dem a *čárka* obmat pickt, der wiad laung (á, é, í, ó, ý, ú). Des sööwe güüt aa fian *kroužek* (ů), dea wos owa nua bein „u“ in da Midtn vo an Wuat vuakummt.
- A jeda Konsonant, dea wos an *háček* odor a *čárka* hod, wiad entweda zu an Zischlaut (š, č, ž, ř) odor ea wiad waach gredt, des haaßt, es kummt a ěuzal vo an *j* dazua (zan Beispüü *t', d', ň*).
- ě redt ma meist so ois wia *je*. Owa wauns noch an *d, t* und *n* kummt, nochad wean de Konsonatn vom ě waach gmocht, so ois wia bei an *haček*.

Grammatik

Oigemeines und Bsundaheitn

Tschechisch is a stoak flektierende Sproch, so ois wia s Lateinische, maunge romanischn Sprochn und aa de meistn aundan slawischn Sprochn. Deklinationen und Konjugationen haum – aus deitschsprachiga Sicht – recht kompliziade Musta und gengan oft bis in Wuatstaumm eine, wos aar a Grund is, dass Tschechisch ois schwaare Sproch güüt.

De Hauptweata wean noch drei Geschlechta - **Maskulinum**, **Femininum** und **Neutrum** - untadeut. Ois bsundare Fuam kummt no bein Maskulinum des „Männlich belebt“, des wos fia Maunna und fia Viecha mit an männlichn Geschlecht güüt, dazua.

Verben san in sechs Konjugationsglaassn untadeut, wöchane ma iwa de Endungan im Infinitiv seng kau.

Ma untascheidt stoake und schwache Adjektive. De stoakn haum a geschlechtsspezifische Endung (Maskulinum: -ý; Femininum: -á; Neutrum: -é), de schwachn hean bei olle Geschlechta mit -í auf. Im Komparativ wean stoake Adjektive in schwache umgwaundlt.

Artikl und Personalpronomen föön oft, weu de haundlnde Peason oda Soch duach de Endung vom Verb doagstööd wiad. Grod bei aana bsundan Betonung, oda wauns kaa Verb gibt, weans heagnumma. Beispüü: *Muž pracuje.* = (Da) *Mau hacklt.* Owa: *Ten muž pracuje* = **Dea** *Mau haacklt.*

A weidare Bsundaheit is, dass Personalpronomen in da drittn Peason plural aufdeut noch Geschlechta gibt.

Deklination

Is Tschechische hod 7 Fölle: Nominativ, Genitiv, Dativ und Akkusativ ois wiar im Deitschn; dazua kumman no Vokativ, Lokativ und Instrumental. Da Vokativ is da Aunredfoi, den wos ma vawend't, waummar a Peason dirket auspricht, z. B. „Ahoj Milane!“ (Servas Milan!). In Lokativ vawend't ma bei Uatsaungobn, z. B. „Na univerzitě (Nominativ. Univerzita)“, in Instrumental, waumma wos mid wen oda mid an Gegnstaund mocht, z. B. „Jedu autem (Nominativ: auto)“ – „i foah midn Auto“. De letzn zwaa Fölle kennan owar aa so wia da Genitiv, da Dativ oda da Akkusativ mid Präpositionan oda Zeitweata vabundn sei, z. B. da Lokativ bei da Präposition „o“ (iwa): „mluvím o olze (Nominativ: Olga)“ – „i red iwa d Olga“. A Bsundaheit is aa da Genitiv Plural, wöchana daunn vawend't wiad, waunns um a Menge vo fümfe oda meah geht, z. B. *trí piva* – drei Bia, owa: *pět piv* = fümf vo de Biare.

A gaache Iwasicht

1. kdo, co? (Wea, Wos?)	Nominativ
2. koho, čeho? (Wem sei?)	Genitiv
3. (ke) komu, čemu? (Wem, Wos?)	Dativ
4. koho, co? (Wen?, Wos?)	Akkusativ
5. (Waumma wen aredt)	Vokativ
6. (o) kom, čem; kde? (Iwa Wen, Iwa Wos; Wo?)	Lokativ
7. (s) kým, čím? (Mit wem, mit wos?)	Instrumental

De Deklination vo de Hauptweata und Pronomen hängen im wesantlichn oo vom Geschlecht („männlich belebt“ hod dabei a aundares Musta ois wia „männlich“) und vo da Endung (hoata, waacha oda mittlara Konsonant; Vokal). Aussadem gibt's no an gaunzn Schiwwe Ausnauman, so ois wia Viecha, de wos auf -ře aufhean oda Fremdweata, de auf -um aufhean. De Deklination vo de Pronomen und Adjektive richt si nochn Musta vo de Hauptweata.

Konjugation

Im Tschechischen hods drei Zeitr: Präsens (Gegenwoat), Präteritum (Vagaunganheit) und Futur imperfekt (Zukunft). Präteritum und Futur imperfekt wean mid Hüüfszeitweata ausm Verb „být“ (sei) doagstööd.

A Bsundaheid san de vaschiedanan zeidlichn Aspekte, de wos mit Suffixe und Präfixe doagstööd wean. So gibts .z. B. in da Zukunft nebman imperfektiven aa an perfektiven Aspekt, wöchanen ma si a wengl so vuastöön kau, ois wiar im Englischn de Fuam: *I am going to..*

Beispüü:

- **Präsens:** *Pravě to dělám* - I **moch** des *grod*
- **Futur perfekt:** *Brzo to udělám* - I **moch** des *boid*

■ Futur imperfect: *Budu to dělat příští rok* - I wea des nächsts Joah mochn

In Imperativ gibts in Singular und Plural, da Konjunktiv wiad mid Hüüfszeitweata ausm Verb „být“ ('sei) *doagstööd*.

Aussadem gibts aktive und passive Fuaman.

Historische Entwicklung

Vo da Zeit ausn 5. bis ins friare 9. Jhd, wia de Ahnl'n vo de heitign Tschechn Behman und Mäh'n besiedlt haum, waaß ma so guat wia nix iwa d Sproch. Grod a poa Peasonannauman san iwaliefat.

Da easchte belegte Aufaug vo da tschechischn Sproch woa de **Urtschechische Zeit**, de vom 9. Jhd. bis ins 12 Jhd dauad hod. Litaratursprochn woan domois in Behman und Mäh'n Latein und Oid- Kirchnslawisch. Es gibt aus dera Zeit kaane iwaliefadn Dokumente, de wos in aan Aufguß auf Tschechisch gschriebm san. Olladings kumman nebm Uats- und Peasonannauman scho aanzlne tschechische Weata in lateinische Texte vua. De – vo Linguistn augnummane – Voikssproch in Behman und Mäh'n woar a Oat Urslawisch mid an regionaln Eischlog.

De easchtn duachgängig auf Tschechisch gschriewanan Texte gibts daunn om Aufaug vo da **Oidtschechischen Zeit**, de wos vom 12 bis ins 15 Jhd dauat hod.

Augfaungt midn 12 Jhd. hods se de Sproch vom Urslawischn imma weida wegga entwicket. es hod an Hauffn Lautvaschiawungan gebm. Zwaa Beispüle san: es is da Laut *ř* entstaundn, is g hods se in etliche Fölle in Richtung h varändat (Bsp. Glava – hlava „Koopf“, gora – hora „Beag“). Is Kirchnslawisch hod sei Bedeutung valuan, Latein is ois Kanzlei- und Wissnschoftssproch bliemb. Schee laungsaum is a Schriftsproch aus de domolign Mittlbehmischn Mundoatn entstaund, es haum si berufliche Fochausdruck und a Dichtung entwicket. De easchte behmische Rechtsschreiwung hod no kaane Hakal und Ringal ghobt, ma hod se mid de vuahaundanen lateinischn Buchstobm ausghoifn. (z. B. rz fia ř, zz fia ž).

Da Reformator Jan Hus hod se recht ausfiahlich mid da tschechischn Grammatik ausanaunda gsetzt In dera Zeit san aa de easchtn diakritischen Zeichn – Vuagänga vom *háček* und vo da *čárka* - aufkumma. De Diakritika wean oigemein in Jan Hus zuagschriem; owa si s wiakli sööwa ausdengt hod, waaß ma net. Is Tschechische hod domois an großn Eifluss auf aundare slawischn Sprochn ghobt. De Idee mit de diakritischn Zeichn is vom- Slowakischn, in Poinischn, in Sorbischn, in Krowodischn und Slowenischn – iwanumma wuan. Aum End vo da Oidtschechischn Zeit gengan aa schee laungsaum de oidn Vagaunganheitsfuaman Aorist und Imperfekt beule (a weng so ois wia bein



Jan Hus

Owadeitschn Präteritumsschwund), aa bein Futur imperfekt vaschwindn öödare Fuaman.

In da **Mittltschechischn Zeit**, vom 16. bis ins 18. Jhdt, geht da Eifluß vom Tschechischn ois Aumbtssproch zruck. A bsundara Eischniid woa de Schlocht am Weissn Beag, noch dera de Hussitn eahnare Mocht in Behman und Mäh'n valuan haum. Ois Vawoitungssproch hod si Deitsch duachgsetzt. Trotz oidem is de tschechische Sproch owa net untagaunga. Es hod a duachaus guat entwickete litararische Leb'm gebm, fia de Slowakn im domolign Owa- Ungarn woar is Mittltschechische de Schriftsproch. Da bekaannteste Schriftstöll'a aus dera Zeid is da Johann Amos Comenius. Gengas End vom 18. Jhdt. hod owa de Tschechische Literatur a weng stagniat.

De Reaktion auf de Stagnation woa da Aufaung fia de **Neitschechische Zeit** – vom 18 Jhdt. bis heid. In da tschechischn Intelligenz is a neichs Intaressa aufkumma, dass ma si mid da Tschechischn Sproch wieder a wengl ausanaund setzt. Des easchte wichtige Weakl woa 1809 des tschechische Grammatikbiachl vom Josef Dobrovský. Sei Kolleg Josef Jungmann hod 1834 – 1839 mid sein Tschechisch-Deitschn Weatabiachl de Grundlogn fia d modeane Tschechische Schriftsproch glegt.



Johann Amos Comenius

Wos mitn Boarischn und in Hochdeitschn ztuan hod

Zwischn de Tschechn und de deitschsprochign Vööka - bsundast aa Östareich und Oidbayern- hods scho seidn Aufaung vom Middloita an Bevöökarungsaustausch gebm. Zweng dem gibts aa recht vüü Weata, de wos vo aana Sproch in de aundare ummagschwappt san. Is Tschechische is ollaweu untar an Eifluss vom Deitschn gstaundn. Easchte Beispüle fia des gibt's scho im 14. Jhd.: in da oidschechischn Satire „Mastičkář“ (da „Soibmtandla“) finden si Eischübe wia z. B. „*wo pistu kwest*“. Net olle Tschechischn Linguistn woan iwa des recht begeistat. Scho da Ján Hus hod iwa seine Laundsleid grantlt: *.....hodni by byli mrskánie Pražené i jiní Čechové, jenž mluvie odpoly česky a odpoly německy, říekajíchantuch za ubrusec, šorc za zásteřku.....*(Uandlich mid da Peitschn ghaut ghearatn de Prager und aa de aundan Tschechn, weu se redn hoiwat deitsch, hoiwat tschechisch; se song... Haundtiachl stod ubrusec, Schiazn stod zásteřka, Auf dar aundan Seitn haum si owar aa scho midtlhochdeitsche Dichta mit da Tschechischn Sproch beschäftigt. Wernher der Gartenaere schreibt z. B. in sein „Meier Helmbrecht“: *zuo der muoter sprach er sa, beheimisch dobraytra* (zua Muada hod a so gsprochn, auf behmisch: dobre jitro (=An guadn Morgn). Aa de boarischn Dialekte haum im Lauf vo de Joahundate etliche tschechische Weata iwanumma. In Wean und Umgewung hod sbis ins 20. Jhd. eine a Mischkulanz zwischn Boarisch/Weanarisch und Tschechisch gebm, is Kuchlbehmische.

Bohemizismen im Boarischn

Mehr iwa des findst im Hauptartike: Tschechisch im Boarischn

- *Buchtl* kummt vo *buchta*
- *Kren* kummt vo *Křen*
- *Kukuruz* kummt vo 'sladká kukuřice (*des is a siassa Kukuruz; is Wuat "kukuřice" sööwa is ausn serbischn ins Tschechische eigwaundat*)
- *Pfrnjak* (Nosn) kummt vo *frňak*
- *plaazn* (waana) kummt vo *plakat*
- *pomalig*, *pomale* oda *pomadig*, *pomade* kummt vo *pomalý*
- *Tschoppal* kummt vo *čapek*
- *Tuchent* kummt vo *duchenka*
- *Powidl* kummt vo *povidla*
- 'schetzkोजना (*egal*) kummt von všeco jedno (*Des is aa Mundoat, in da Standartsproch haasats všechno jedno*)

“Bajuvarizismen“ im Tschechischn

Mehr iwa des findst im Hauptartike: Boarisch im Tschechischn

- *kšeft* kummt vo *Gschäft*
- *ksicht* kummt vo *Gsicht*
- *bajsl* kummt vo *Beisl*
- *hajzl*, *hajzlpapír* kummt vo *Haisl* (Klo)
- *fešák* kummt vo *Feschak*
- *šnuptychl* kummt vo *Schnupftiachl*
- *vercawk* kummt vo *Werkzeug*

Germanizismen im Tschechisch

- *cíl* kummt vo *Ziel*
- *švagr* kummt vo *Schwager*
- *flétna* kummt vo *Flöte*
- *haléř* kummt vo *Heller*
- *hřbitov* kummt vo *Friedhof*
- *knoflík* kummt vo *Knopf*
- *nášup* kummt vo *Nachschub*, *Nachschlag* (z. B. *Essen*)
- *nudle* kummt vo *Nudel*
- *šunka* kummt vo *Schinken*
- *talíř* kummt vo *Teller*
- *valčík* kummt vo *Walzer*
- *žold* kummt vo *Sold*
- *'sál* kummt vo *Saal*

Beleg

1. Karlík P., Nekula M., Pleskalová J. (Hrsg.). Encyklopedický slovník češtiny. Nakl. Lidové noviny. Praha 2002

Literatur

- J. Vintr: Das Tschechische. Hauptzüge seiner Sprachstruktur in Gegenwart u. Geschichte (2001)

Im Netz

 [Wikipedia auf Tschechisch](#)

 [Commons: Tschechische Sprache](#)

(https://commons.wikimedia.org/wiki/Category:Czech_language) – Sammlung vo Buidl, Videos und Audiodateien

 [Commons: Tschechische Aussprache](#) (https://commons.wikimedia.org/wiki/Czech_pronunciation) – Oibum mit Buidl, Videos und Audiodateien

- [Seznam slovník: A gaaches Weatabiachl](http://slovník.seznam.cz/) (<http://slovník.seznam.cz/>)
- [A Sammlung vo Zunganbrecha](https://web.archive.org/web/20191204071809/https://ivypana.com/tongue-twisters-czech) (<https://web.archive.org/web/20191204071809/https://ivypana.com/tongue-twisters-czech>)
- [Tschechisch gesagt- Tschechischkurs von Radio Prag](https://web.archive.org/web/20070224030439/http://archiv.radio.cz/deutsch/gesagt/) (<https://web.archive.org/web/20070224030439/http://archiv.radio.cz/deutsch/gesagt/>)

- Eintrag zua tschechischn Sproch in da „Enzyklopädie des Europäischen Ostens“ (<https://web.archive.org/web/20070927005055/http://www.uni-klu.ac.at/eeo/Tschechisch.pdf>)
- Wos Tschechisch und Noadboarisch midanaund ztuan haum (<https://web.archive.org/web/20080511080604/http://www.bbkult.net/contrib/press/2/details/11435886533260>)
- Weatabuach Deitsch - Tschechisch (<https://web.archive.org/web/20080624000500/http://www.woerterbuch-uebersetzung.de/deutsch-tschechisch/index.html>)



Dea Artike is ois **zimfti** in de Hall of Fame (Ruhmeshoin) aufnumma worn.



Slawische Sprochn

Ostslawisch: Oidnowgoroda Dialekt † | Altostslawisch † | Karpato-Russinisch | Russisch | Ruthenisch † | Ukrainisch | Weißrussisch | Westpolessisch

Westslawisch: Kaschubisch | Knaanisch † | Niadasorbisch | Obasorbisch | Polabisch † | Pomoranisch † | Poinisch | Slowakisch | Slowinzisch † | Tschechisch

Sidslawisch: Ägäis-Mazedonisch | Altkirchenslawisch|Oidkiachaslawisch † | Banater Bulgarisch | Bosnisch | Bulgarisch | Buagnlaundkrowodisch | Krowodisch | Mazedonisch | Moliseslawisch | Montenegrinisch | Serbisch | Serbokrowodisch | Slowenisch

Andane: Jugoslawo-Russinisch | Kiachaslawisch | Russenorsk † | Slawenoserbisch † | Slovianski | Slovio | Urslawisch †

† ausgstoom

Vh „https://bar.wikipedia.org/w/index.php?title=Tschechische_Sproch&oldid=737817“

De Seitn is zletzt am 25. Jenna 2020 um 02:43 gändert worn.

Abuafstatistik

Dea Text is unta da Lizenz „Creative Commons Attribution/Share-Alike“ vafigbor; zuasätzliche Bedingunga kennan owendbor sei. Oazlheitn san in de Nutzungsbedingunga bschriebm.